

沁源縣志

卷三

名宦傳

循良之選無逾兩漢召父杜母由來尙矣後世官習於脂韋士競於夤緣臥轍攀轅徒成市道何武之去思其絕響乎雖然作事果依乎天理公道自在於人心田夫野老口碑具在誰謂古今人不相及也沁邑山區民俗樸直樸則口鮮浮詞直則書無曲筆苟名留於志乘必惠洽於閭閻爰舉舊志之良吏著於篇又益以近世之卓卓者以昭既往以勵將來毋亦召公棠羊公碑之遺意歟作名宦傳

金

丁緯仁字藏用宛平人皇統二年進士授武清縣丞縣經兵革後

無學校公召邑中俊秀子弟教之學百姓欣然從之調磁州軍事判官是時詔使廉察官吏公以廉能攝守事遷和川令前令巽奕不事事羣小越法干禁無所憚公申明法禁皆屏息或走他鄉以避之有董祐者最强悍畏威服德至以刀斷指誓終身不復犯法凡租賦與百姓前爲期率比他邑先辦累官陝西西路轉運使大定二十一年卒於官崇祀名宦

王特起崞縣人太和中爲眞定錄事參軍有惠政改沁源令愛民禮士去後常見思崇祀名宦

元

張德鄰字友仁壺關人由簿書至元十三年任履正奉公不避權

勢除繁苛之役抑貪鄙之風鄰縣武鄉民孫元住以疑盜繫獄主者鞠勘數四不得其情援引至數十人申於州州批公按問公委曲推究元住果柱由是平反議者咸服其明繇營戌卒擾民一以法繩之後莫敢犯蒞任三年盜息民安受代之曰吏民莫不歎息爲立去思碑崇祀名宦

明

邵善南直高郵州人洪武六年任首建縣治公廨修立學校招集士類勸化風俗陞工部郎中

鄺孟珏湖廣興山人由人才洪武十三年任勸農興學均平賦役陞左督府斷事

李榮山東壽光人舉人宏治八年任振作有爲重修學校壇墠整飭舖舍地方賴之

王顯直隸房山人宏治十五年任舊志稱有善政

曹聰遼東瀋陽衛人監生宏治十八年任舊志稱有才幹

馮繼祖陝西興平人舉人正德十六年任增修城池扶弱抑強稱能吏焉

李時佑直隸灤州人舉人嘉靖五年任以經術飭吏治政事之暇訓課生徒

郭潤直隸鷄澤人嘉靖八年任作興學校創建啟聖祠敬一廳

賈德潤直隸鷄澤人舉人嘉靖二十年任英敏嚴重興學校抑豪

強勸民輸粟以實倉廩次年秋北兵入寇公急斂人畜入城登
陴禦捍號令嚴明士民咸奮皆效死守之民賴以全

張廷槐字子徵萬全都司人進士初任兵科給事中遇事敢言不
避權貴左遷婺源縣丞在任二年民有冰清月皎之頌嘉靖三
十三年陞任本縣爲政務持大體不屑煩瑣念邑僻民貧賦役
煩重請弛不急之務徵調之令當道重之悉爲報罷民賴以蘇
公餘興學課士甄拔賢才修學宮闢射圃行冠禮正風俗若文
翁之化蜀焉累官按察司副使

張亨甫字謙之直隸內黃人舉人嘉靖四十一年任先是巡撫遣
標兵討山賊楊甫脅從皆降而渠魁猶未授首四境騷然公下

車諭衆曰生民之休戚係守令之賢否今邑之凋敝若此吾之責也督率吏民擒賊首正法地方以寧乃詢訪利弊漸次興除民皆復其故業素性質朴廉介自持在任六年始終一節陞魯王府審理邑人思慕立石紀德焉

記文見碑闕考

邢堯年山東丘縣人恩貢萬曆三年任德性溫雅立心清潔未幾以疾乞休去

宋崇猷直隸大興人舉人萬曆四年任寬嚴操縱深識治體未半載以前任改教

靳賢字子哲陝西靜寧人舉人萬曆五年任釐奸剔弊吏畏民懷遵例丈田履畝定稅減三分之一縣城舊係土城每歲傾圯勞

民動衆公申請當道包以磚石爲生民豎千百年保障陞潞安府通判復陞岢嵐州知州乞休去沁人追思不置立生祠祀焉朱朝龍湖廣黃岡人舉人萬曆十五年任清慎持己平易近人不愧民之父母

于木直隸靜海人舉人萬曆十八年任儉以助廉寧靜不擾未幾乞休上官留之竟浩然而去

侯體乾河南歸德人選貢萬曆二十年任能文章持節操裁省里長督課農桑捐柴馬銀以補窮民逋賦且表揚節義易俗移風因母老乞休百姓送之遮道涕泣

方簡陝西膚施人選貢萬曆二十四年任才識英銳政尙嚴明禁

戢豪強修舉廢墜當道重之後以延安尙書楊某事株連被逮
士民失望

李培聰直隸故城人舉人萬歷三十二年任存心仁恕政尙廉平
在官二年四民樂業

王純字文我陝西秦州人舉人萬歷三十五年任行鄉約修學宮
課庠生釐奸剔弊通賦一清未幾調巴陵知縣邑人爲立去思

碑

記文見
碑碣考

杜汝懋直隸廣平人舉人萬歷四十四年任素性廉慈刊布善言
勸民向化表貞烈置義塚皆以實心行實政時有飛蝗從東南
來頭翅盡赤翳日蔽天公齋戒禱於八蜡廟未幾羣鴉食蝗殆

盡禾稼無傷人以爲賢令格神之效調襄垣知縣陞陝西鳳翔府知府

孫夢麟山東平陰人貢生萬歷四十七年任仁心爲質家視縣子視民立社學以誘後進買牛種以恤羣黎課士助婚表揚節義邑人迄今頌之

劉芳大號九畹河南洛陽人選貢崇禎元年任念切民隱務以休養爲先兼之扶持善類在官三載註誤降調而去士民攀留不得爲立去思碑

記文見碑碣考

范廷輔號鷺猗山東滋陽人舉人崇禎四年任性直而才敏清慎著稱時流寇猖獗乃於城西紫金山建保安寨以衛城又於城

外增設重門以嚴啟閉復勸助米豆召兵捍禦地方賴之其他
德政不可勝紀調芮城知縣歷陞山西冀寧道沁民思之立祠
以祀

孔聞讜山東曲阜人至聖裔舉人崇禎八年任正直不阿清慎自
矢緩征以舒民困明法以戢奸宄時寇分掠縣境公廉得賊中
要領招其黨授以計擒其魁殲焉尤善造箭發則斃賊保城定
亂厥功甚偉邑人立祠祀焉

縣丞

廖德愿洪武二年任創建縣治

典史

李華陝西涇陽人嘉靖二十四年任贊明庶政能幹有爲

傳行忠浙江山陰人萬歷七年任操守廉靜才識通明督修城工
著有勞績

李孟春河南單縣人萬歷二十年任自備資囊以供薪水纖毫不

取於民朝覲赴京即乞休去

據舊志河南單縣疑必有誤

朱應紫浙江仁和人萬歷三十三年任博通文翰行己端方處事
幹練贊理庶政恩信孚於閭閻甫二載陞袁州府司獄百姓遮
道攀留久之乃得去

趙萬芳陝西三原人崇禎五年任佐修保安寨有功且勸民鑿井
功在閭閻

教諭

李志仁直隸阜城人歲貢隆慶任元年捐俸修廟時集庠士課藝供其飲食通邑皆感頌焉

何伯仁直隸保定人歲貢萬歷元年任孝友傳家忠誠待士

馮紀平定人舉人萬歷十一年任下帷讀書教人不倦聘典文衡號稱得士

靳科襄陵人選貢萬歷十五年任淳篤愛士陞延州學正

趙萬禹陝西高陵人萬歷十九年任器度英偉才畧果毅陞鳳陽府通判

王省方安邑人歲貢萬歷二十一年任賦性淳謹制行安和陞涼

州衛學正

熊衣江西南昌人歲貢萬歷二十九年任博學能詩安分守禮陞南陽府教授

訓導

高景直隸鳳陽衛人歲貢嘉靖九年任文學優長教人不倦

李馨直隸延慶人歲貢嘉靖十六年修待諸生恩義兼盡時母老家居不能迎養泣請於當道願告歸當道以馨勤於訓課無負司鐸之選移文原籍月給米一石以佐馨俸所不足在任與諸生講學論文布衣疏食泊如也陞繁峙縣教諭子守眞亦由歲貢歷官饒陽縣知縣著籍沁邑

郝濟山東新泰人歲貢嘉靖二十六年任夙饒文學尤長於詩陞蒲州學正

孫希賢河南洛陽人歲貢嘉靖二十九年任淳厚端莊誨人不倦
沁庠曩無習易者希賢爲易學專家悉心指授庠生業易者幾半

高龍直隸束鹿人歲貢嘉靖三十三年任寬厚能容人過士咸服焉

馬文卿舊志盱眙人舊碑魚臺人歲貢嘉靖三十七年任未幾棄官去

徐秉心直隸唐山人歲貢萬歷二年任嚴以律己勤以課士邑庠

經生曩缺禮記秉心爲正句讀發明義旨受教者多得其傳

李粉河南涉縣人歲貢萬歷十四年任秉禮好義有守有爲學官
歲久傾圯倡衆修葺貧士有才學者捐俸周之率二三子巡行
阡陌教農人畊作開渠以興水利上官廉其善將登薦剡未幾
卒於官士民莫不哀惋

賈淑誼太原府人歲貢康熙十三年任品行端方士人欽服

葛性醇吉州人歲貢雍正三年任年近八旬猶稱矍鑠訓士以德
行爲先批閱課藝理法井井邑中童子以書文請教者無不循
循善誘士林方切師長之戴而或以疾終諸孤扶襯歸里邑之
官民奠送郊外西望潛然

清

知縣

劉璇直隸永平人貢生順治元年任自明季以來沁邑實爲盜藪人民流亡大半其存者率朴野使氣習鬪健訟公蒞任一以禮讓教之皆革心從化漸次復業賦稅正供外一切不擾時時詢民疾苦凡邑中貧不能耕者給籽種不能婚者助聘資復加意人文訓課庠士由是科目漸興三載陞湖廣鄖陽府同知後殉難贈按察司僉事邑人追思崇祀名宦

張一龍奉天錦州人貢生順治六年任時姜襄之亂禍連沁屬及大兵臨剿以縣民從賊將盡屠之一龍叩頭哀請願以百口保